


TEZĂUR LITURGIC
4 FEBRUARIE

ACATISTUL
SF. CNEAZ
IURIE-GHEORGHE
VSEVOLODOVICI
DE LA
VLADIMIR



MOSCOVA, 2000



Акафист

святому благоверному князю

Георгию, Владимирскому

чудотворцу

Кондак 1

Избранный угодниче Христов, благоверный княже Георгие, возсиявый миру, яко звезда богосветлая, святостию и чудесы твоими, приими похвальная пения любовью чтущих святую память твою и со сродники твоими, святыми князи Андреем и Глебом, моли Христа Бога сохранитися невреденным нам от видимых и невидимых враг, да со умилением вопием ти:

Радуйся, святой благоверный великий княже Георгие.

Икос 1

Ангельское житие возлюбив от юности и ко исканию единого на потребу направив помыслы твоя, княже Георгие, дивный образ был еси

добродетелей христианских и совершенства
духовного; темже и возвеличен был еси на земли
пред братиею твоею и на небеси прославлен еси
от Господа. Сего ради славяще, зовем ти сице:

Радуйся, богоизбранный княже земли
Российския.

Радуйся, пречестная отрасль
равноапостольного князя Владимира.

Радуйся, святости князя Андрея
Боголюбского подражателю.

Радуйся, благоверия князя Глеба наследниче.

Радуйся, яко тобою град Владимир
украшается.

Радуйся, яко Бог в тебе дивен является.

Радуйся, святой благоверный великий княже
Георгие.

Кондак 2

Видение преславное Богоматере, бывшее
благочестивому сроднику твоему князю Андрею,
и множество чудес, явленных от чудотворныя Ея
иконы, укрепиша в глубине юныя души твоея,
святые Георгие, пламенную любовь ко Господу и
усугубиша святыя подвиги твоя. Помози убо и

нам, святче, добродетелем и любви твоей последовати, да благоприятно воспеваем Богу: Аллилуия.

Икос 2

Разум пленивый в послушание веры, богомудре, с молитвою и благоговением приял еси жребий служения стране твоей и, стяжав божественную благодать, всем был еси в нуждах скорый помощник и покровитель; темже ублажаем тя, святой княже, и, славяще Божие о тебе промышление, вопием ти:

Радуйся, Отечества нашего ревностный защитниче.

Радуйся, православия поборниче.

Радуйся, христианского благочестия блюстителю.

Радуйся, милости и помощи нуждающимся подателю.

Радуйся, яко тобою вернии просвещаются.

Радуйся, яко прославляяй тя чудесы Бог тобою всех к себе призывает.

Радуйся, святой благоверный великий княже Георгие.

Кондак 3

Силою молитв и благодати Божией подобен был еси, святе Георгие, благоверному князю Глебу, принесшему все житие свое в жертву Господеви, и твоим смирением удивил еси сродники твоя, хотящим лишити тя великокняжеского стола властолюбия ради. Сего ради дивно прослави тя Господь, Емуже предстоя со Ангелы воспеваеши ныне: Аллилуия.

Икос 3

Имея велию веру и любовь к Господу и соблюдая божественная словеса Его "да любите друг друга", ты, святой княже Георгие, яко пастырь добрый, не восхотел еси мстити присным твоим, но кротостию обличая их, с любовию увещавал еси сохранять мир в сердцах своих. Темже убо величающе смирение твое, взываем ти сице:

Радуйся, любовь Христову себе стяжавый.

Радуйся, люди, врученныя свыше скиптру твоему, добре управивый.

Радуйся, гнев на ближняго до конца в себе умертвивый.

Радуйся, уста своя от клеветы заградивый.

Радуйся, яко тобою всякая вражда и злоба побеждаются.

Радуйся, яко от Бога и человек достойне возлюблен был еси.

Радуйся, святыи благоверный великий княже Георгие.

Кондак 4

Бурю бед и скорбей претерпел еси, святыи княже Георгие, егда брат твой воздвиже брань на тя и, востав со многими полчищи, на изгнание тя осуди; незлобиво восприял еси чашу поругания, богомудре, и скорбь не возможе поколебати храмину души твоея, основана бо бе на твердем камени веры во Христа. Темже, дивящеся величию терпения твоего, воспеваем к укрепившему тя Господу песнь: Аллилуия.

Икос 4

Слышаще многую хвалу твоему великому милосердию к бедным, святе Георгие, стекахуся к тебе мнози томимии голодом и обретаху вся потребная; воспоминающе дивная твоя благодеяния, смиренно молим тя, не остави и нас милостию твоею, испроси нам у Небеснаго

Владыки земли плодоносие, от глада избавление,
да непрестанно восхваляем тя сице:

Радуйся, милости и сострадания
преисполненный.

Радуйся, страждущим в жизни сей
сострадателью.

Радуйся, беспомощным скорый помощниче.

Радуйся, всем сущим в напастех милосердый
заступниче.

Радуйся, яко тобою немощнии сильни
бывают.

Радуйся, яко молитвам твоим Господь
благоутробно внемлет.

Радуйся, святой благоверный великий княже
Георгие.

Кондак 5

Боголюбивый угодниче Божий Георгие,
восприяв великия скорби, и яко язвы Господа
Иисуса на телеси твоем понесый, укреплялся еси
духом при гробе святых сродников твоих,
князей Андрея и Глеба, изливая пред ними
печаль твою. Мы же, взирающе с трепетом на

пречистыя мощи ваша, преклоняем колена, со умилением взывающе Богу: Аллилуия.

Икос 5

Видевше тя людие града Владимира, по речным струям в легкой ладии носящаяся и во изгнание из древняго града в страну Волжскую пресекаящаяся, с сокрушенным сердцем и слезами к тебе устремися; ты же, угодниче Божий, молился еси о них, благословляя их. Не презри и нас, прибегающих к заступлению твоему и воспевающих ти хвалы сия:

Радуйся, дивную крепость духа в скорби показавый.

Радуйся, терпением злобу мира сего победивый.

Радуйся, яко всего себе в жертву за люди твоя принесл еси.

Радуйся, яко Отечество твое от погибели спасл еси.

Радуйся, яко заступлением твоим и ныне Царство Российское от междоусобных брани охраняется.

Радуйся, яко предстательством твоим уповаем и мы от бед избавитися.

Радуйся, святой благоверный великий княже Георгие.

Кондак 6

Проповедника добрых дел явил еси себе, преблаженне княже Георгие; ты бо, ревнуя о благочестии, украшал еси церкви, христианом был еси покровитель, алчущим питатель, беспомощным и угнетенным защитник. Сего ради, надеющиеся на твое милосердное о нас попечение, усердно прибегаем к твоему заступлению, взывающе благодарственно Богу: Аллилуия.

Икос 6

Возсиял еси пречудно добротою души твоея, святой угодниче Христов, егда видя слезное покаяние князя, брата твоего, иже на одре смертном с сокрушенным и смиренным сердцем прощения прошаше у тебе, забыл еси вся козни его и понесенныя тобою скорби и, облобызав его, обещал еси быти чадом его во отца и покровителя. Ублажая таковое истинно христианское братолюбие твое, вещаем ти таковая:

Радуйся, брата твоего, враждовавша на тя, любовь Христовою возлюбивый.

Радуйся, того на смертном одре прощением и утешением укрепивый.

Радуйся, благая за зло воздавый.

Радуйся, отеческую любовь вдовице и сирым обещавай.

Радуйся, яко дивный образ любви Отца Небеснаго в себе явивый.

Радуйся, пример братолюбия христианскаго и всем нам оставивый.

Радуйся, святой благоверный великий княже Георгие.

Кондак 7

Хотя Господь явити благодать Свою, дарова тебе, яко избраннику Своему, силу благоугождати Ему; ты же, святой княже Георгие, возлюбил еси Господа твоего всем сердцем твоим и всею душею твоею, и ближняго твоего, яко сам себе; явился бо еси сиротствующим чадам брата твоего воистинну покровитель и утешитель, споспешествуя благому устройению жития их. Сице убо яви

милостивую помощь твою и нам, молящимся ти и поющим Господеви: Аллилуия.

Икос 7

Новое знамение благоволения Божия даровася тебе, святой угодниче Божий, егда Господь возврати тя на престол великокняжеский и прослави тя паче братьев твоих. Темже, уповающе на святые молитвы твоя, молим тя, помози нам достойно ходити звания, в немже поставлени есмы, да поем ти сице:

Радуйся, святых страстотерпцев Бориса и Глеба в Царствии Небесном сонаследниче.

Радуйся, святых князей Андрея и Глеба богоизбранный преемниче.

Радуйся, в народоправлении велию мудрость проявивый.

Радуйся, подчиненныя ти люди на путь благочестия направивый.

Радуйся, яко молитвами твоими престолы правоверных царей утверждаются.

Радуйся, славо и утверждение града Владимира.

Радуйся, святой благоверный великий княже Георгие.

Кондак 8

Странное и преславное чудо совершися в дивней победе твоей, святой княже Георгие, над нечестивыми враги, пришедшими от берегов Оки и Волги; с молитвою бо во устех и мечем в руце усмирил еси я. Сице избави ны от враг видимых и невидимых, брань на ны воздвизающих, и на правый путь спасения направи нас, да возможем воспевати Божии: Аллилуия.

Икос 8

Всего себе предав воли Божией, неутомимое попечение имел еси о стране твоей, защищая ю и укрепляя; многотрудное бо совершил еси шествие для устроения Новаграда низовския земли, идеже церковь во имя Спаса устроил еси и многия неверныя ко Христу привел еси. Темже славяще благоприятное твое о людех попечение, вопием ти:

Радуйся, Новград на защищение Отечества от врагов устроивый.

Радуйся, святыми храмы той украсивый.

Радуйся, веры Христовы усердный проповедниче.

Радуйся, о спасении грешных теплый молитвенниче.

Радуйся, яко имя твое доныне в Новеграде прославляется.

Радуйся, яко и на небеси славою и честью от Бога превознесен еси.

Радуйся, святой благоверный великий княже Георгие.

Кондак 9

Вси людие радовахуся, егда цельбоносныя мощи святого страстотерпца Авраамия по повелению твоему, святой княже Георгие, несены быша из Болгарския страны во град Владимир; ты же, святой угодниче Христов, со святителем Митрофаном и князи и всем священным собором, изшедше в сретение им, со умилением поклонение и молитву сотворил еси, взывая Господу Богу: Аллилуия.

Икос 9

Витии многовещании, от Рима посланнии, не возмогоша отклонити тя от Православныя

Церкве и правыя веры; ты бо, святой исповедниче Христов, рекл еси: паче умрети ми, неже православныя веры отрещися, и тако суемудренныя учителя посрамил еси. Сего ради ублажаем тя, зовуще:

Радуйся, православныя веры непоколебимый столпе.

Радуйся, Христовы Церкве стено и утверждение.

Радуйся, велию православнаго исповедания тайну иноверным открывый.

Радуйся, заблуждающихся в вере обличивый.

Радуйся, яко тобою и ныне от ересей Церковь ограждается.

Радуйся, яко твоим предстательством и град наш доныне в православии нерушимо пребывает.

Радуйся, святой благоверный великий княже Георгие.

Кондак 10

Спасти хотя страну твою от нашествия злых татарских полчищ, ты, святой княже Георгие, не усумнился еси оставить и дом, и жену, и

братию, и сестры, и чада твоя; но ради спасения ближних твоих от гибели, яко истинный последователь Христов, живот свой положил еси, воспевая Господеви: Аллилуия.

Икос 10

Царю Небесный, Утешителю души моя, взывал еси, святе Георгие, на брани, весть прием о мученичестей кончине присных твоих и, подобно праведному Иову, преклонь колена, молился еси: да будет воля Твоя, Господи! Буди имя Твое благословенно от ныне и до века! Мы же, дивящиеся великому терпению твоему, во умилении зовем ти:

Радуйся, образу верного служения Богу и Отечеству показавый.

Радуйся, дивное отвержение себе спасения ради ближних твоих явивый.

Радуйся, яко пострадати за имя Христово возжелел еси.

Радуйся, яко, мучеником подражавый, лику их сопричтен еси.

Радуйся, яко пред великим мужеством твоим всяк возраст преклоняется.

Радуйся, яко венец твой княжеский
кровными каплями, яко камением чудным,
украсил еси.

Радуйся, святыи благоверный великий княже
Георгие.

Кондак 11

Пение ангельское совершашеся на небеси,
егда безбожнии воины мечем усекнуша честную
главу твою, страсотерпче святыи, и ты предал
еси душу твою в руце Бога живаго, Егоже от
юности возлюбил еси. Темже поминающе
блаженное успение твое, с сокрушенным
сердцем преклонше колена, прибегаем к тебе,
святыи угодниче Христов, и молитвенно просим
тя о еже молиться за нас ко Господу, да и мы
сподобимся вкупе со Ангелы на земли живых
пети Ему: Аллилуия.

Икос 11

Свет Божественныя благодати озари
блаженнаго епископа Кирилла, да совершит
молитву по убиенным воином на поли брани, и
егда шед, обрете обезглавленное честное тело
твое, святе Георгие, потом же и главу твою, и
благоговейне принеси я во град Ростов,

предаде погребению в соборном храме. Мы же, почитающе честная страдания твоя, за веру и Отечество претерпенная, величаем тя сице:

Радуйся, живот твой на брани мужественно положивый.

Радуйся, жизнь вечную в Царствии Небесном получивый.

Радуйся, венец княжеский вкупе со главою твоею неверным за ближних твоя оставивый.

Радуйся, венец мученический от Царя Небесного приявый.

Радуйся, яко тобою и до сего дне Отечество наше от врагов избавляется.

Радуйся, дивный хранителю, от Бога всем нам данный.

Радуйся, святой благоверный великий княже Георгие.

Кондак 12

Божественная благодать явися на тебе, святой благоверный княже Георгие, и неизреченное чудо дивно открыся, егда бо пренесение святых мощей твоих во град Владимир совершашеся, вси людие со страхом и

трепетом узреша, яко честное тело твое бысть цело, и отсеченная глава прильпе к телеси твоему, яко не отсечена. Дивящися убо чудеси и преклоняюще колена, молим тя, угодниче Божий, испроси и нам недостойным благодать и милость от Господа, да возможем богоугодно воспевати Ему хвалебную песнь: Аллилуия.

Икос 12

Поюще радостную песнь хвалы и благодарения Господу, прославльшему тя, святой княже Георгие, восхваляем и святых сродники твоя, вкупе с тобою нетленными мощами своими почивающих: святого князя Андрея, мученический венец приявшего, и святого князя Глеба, дивными подвиги просиявшего, и усердно молим тя с ними услышати хвалебное сие пение нас взывающих:

Радуйся, великий княже Георгие, Престолу Царя Небеснаго предстояй.

Радуйся, о грешнем роде человечеством молитву пред ним возносяй.

Радуйся, от святых мощей твоих многая чудесная исцеления болящим источаяй.

Радуйся, от страстей благодатию, данною ти от Бога, души наша свободядай.

Радуйся, яко тебе и святым князем Андрею и Глебу, сродником твоим, вернии всеусердно покланяются.

Радуйся, наша недостойная хваления благосердно приемляй.

Радуйся, святой благоверный великий княже Георгие.

Кондак 13

О преславный и святой угодниче, страстотерпче Христов, великий княже Георгие, вонми гласу моления нашего и ходатайством твоим испроси нам от Господа в жизни сей в вере и добродетелех утверждение, от ересей и расколов сохранение, от скорбей и напастей избавление, прегрешений наших прощение и в час смертный твердое спасения упование, да сподобимся Царствие Небесное наследовати и вечно воспевати Богу: Аллилуия.

Этот Кондак читается трижды. Затем читается Икос 1, затем Кондак 1

Молитва

О богоизбранный чудотворче, преславный угодниче Христов, Церкви Православныя поборниче. Царства Российскаго защитниче, великий княже Георгие!

Преклоньше колена, молим тя: призри на ны грешныя, прибегающия к твоему заступлению, услыши сие малое моление наше и теплым твоим предстательством умоли Милостиваго Бога, Емуже предстоиши с лики Ангел и со всеми святыми, да сохранит нас в единении Православныя Церкви и утвердит в сердцах наших дух правыя веры и благочестия, и избавит нас от всякаго злаго искушения. По велицей любви твоей, еюже ближния твоя возлюбил еси, испроси у всещедрого Господа Отечеству твоему, и нашему купно, мир и благоустроение; всем же нам, недостойным, усердно к тебе припадающим, богоугодное и безмятежное житие.

О святыи заступниче наш, не остави нас слабых и беспомощных, молися за ны ко Господу и Пречистой Владычице Богородице, подвижни с собою на молитву о нас богопрославленныя сродники твоя, святыя князи Андрея и Глеба, с

нимиже вкупѣ зде на земли нетленными мощами почиваеши и на небеси, у Престола Царя Небесного предстоиши, да дарует Он всещедрый вся нам, яже к пользе временней и вечней потребная; да не воздаст нам по делом нашим, но по неизреченному человеколюбию Своему простит согрешения наша, да избавит нас от всякия нужды и печали, скорби и болезни; да ниспослет нам благое намерение и силу подвизаться в исправлении жития нашего, и в будущем веце да сподобит нас внити в Царствие Небесное и славить Всесвятое имя Отца и Сына и Святаго Духа во веки веков. Аминь.

